

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 265411 25 St
Zenica, 04.08.2026. godine

Općinski sud u Zenici, sutkinja Marina Šapina, u stečajnom postupku nad stečajnim dužnikom Proizvodno, prometno i uslužno društvo „INO“ d.o.o. Zenica, Sarajevska br. 255, Zenica, odlučujući o prijedlogu privremene stečajne upraviteljice Nure Soldin iz Zenice, nakon ročišta održanog dana 26.05.2026. godine, u prisustvu privremene stečajne upraviteljice Nure Soldin iz Zenice i zastupnika po zakonu predlagatelja Senada Mulaibiševića u pratnji punomoćnika Ante Jonjića, odvjetnika iz Zenice, van ročišta dana 04.08.2026. godine, donio je sljedeće:

R J E Š E N J E

Otvara se i zaključuje stečajni postupak nad društvom Proizvodno, prometno i uslužno društvo „INO“ d.o.o. Zenica, Sarajevska br. 255, Zenica, MBS: 43-01-0537-08 (stari broj 1-8723), zbog nepostojanja stečajne mase, te se nalaže brisanje ovog privrednog subjekta iz sudskog registra zavedenog u reg. ul. broj: 43-01-0537-08 (stari broj 1-8723), a po pravomoćnosti ovoga rješenja.

O b r a z l o ž e n j e

Prijedlogom od 18.09.2025.godine, predlagatelja Proizvodno, prometno i uslužno društvo „INO“ d.o.o. Zenica, Sarajevska br. 255, Zenica, zastupan po zastupniku po zakonu Mulaibišević Senadu, direktoru društva, pokrenut je stečajni postupak nad navedenim društvom.

Rješenjem ovoga suda br. 43 0 St 265411 25 St od 19.12.2025.. godine, pokrenut je prethodni postupak radi utvrđivanja uslova za otvaranje stečajnog postupka nad imovinom stečajnog dužnika, te je za privremenu stečajnu upraviteljicu imenovana Nura Soldin iz Zenice, Talića brdo 1A.

Na ročištu za ispitivanje uvjeta za otvaranje stečaja održanom dana 26.05.2026. godine, privremena stečajna upraviteljica je izjavila da ostaje kod izvještaja od 19.02.2026. godine. Navodila je da društvo smanjeno posluje naročite unazad 4 godine, što je vidljivo iz priloženog bilansa stanja i bilansa uspjeha za 2025. godinu, iz kojeg se vidi da su stavke aktive i pasive iste, znači ništa se nije mijenjalo. U knjigovodstvu postoje iznosi za zalihe sirovina i materijala od 40.800,00 KM, zalihe gotovih proizvoda od 11.511,00 KM, zalihe roba od 6.960,00 KM, te potraživanje od kupaca od 32.881,00 KM, dok je u toku prethodnog postupka stečajna upraviteljica sazvala komisiju za popis, koja je otišla na lice mjesta u sjedište stečajnog dužnika, da bi utvrdili stvarno stanje imovine kojom prilikom je utvrđeno sljedeće: na dan 18.02.2026. godine, od opreme su na stanju jedan stari računar i jedan stari printer koji su knjigovodstveno otpisani i zastarjeli, komisija je procijenila da bi njihova tržišna vrijednost bila 80,00 KM. Dalje navodi da prema uvjerenju MUP-a, na stečajnom dužniku se vode dva neregistrovana teretna vozila VW Cady i Mercedes Benz 208, da navedena vozilansu zatekli u sjedištu društva i prema izjavi direktora stečajnog dužnika vozila su prodana prije 10-15 godina. Kontaktirala je knjigovodstveni servis AS da utvrdi kada su vozila prodana. U prepisci putem e-maila knjigovodstveni servis joj je rekao da su ta vozila prodana tj. da je stanje svih vozila na dan 31.12.2025. godine 0, ali pošto nisu vodili analitički po vozilima, stečajna upraviteljica ne može točno da utvrdi kada su prodana. Dostavljena joj je kartica svih vozila, na kojima se vide da pišu na računima broj računa/godina prodaje, tu se spominju 2020 godina, 2017. godina i 2019. godina. Navodi da je dostavila izjašnjenje na mjeru obezbjeđenja podnesenu od strane Porezne uprave F BiH, te da je u VW Cady prodat 03.08.2020. godine u iznosu od 1.000,00 KM plus PDV ili ukupno 1.170,00 KM, faktura je priložena uz izvještaj, za drugo vozilo nije dobila fakturu o prodaji, ali iz kartice se vidi da su sva vozila prodana u periodu od 2017 do 2020 godine. Dalje navodi da za zalihe, sirovine i materijale kako je to navedeno u bilansu stanja u iznosu od 40.800,00 KM, daje sljedeće izjašnjenje: da u ove zalihe prodane u vidu kompenzacije za izmirenje dospjelih dugova a nisu knjižene, isto obrazloženje je dao direktor i za zalihe gotovih proizvoda u iznosu od 11.511,00 KM kao i za zalihe robe u iznosu od 6.960,00 KM. Navodi da je za potraživanje od kupaca

od 32.881,00 KM, tražila od suda uvid u službenu evidenciju CMS-a, da dobije listing svih sudskih predmeta i svih statusa ovih predmeta za stečajnog dužnika. Utvrdila je da je stečajni dužnik samo u dva predmeta, kod ovoga suda, označen kao tužitelj i da su oba predmeta arhivirana, oba su iz 2009. godine. te je za ista nastupila zastara, dakle ista su nenaplativa. Dalje navodi, da druga neutužena potraživanja, prema informaciji od knjigovodstvenog servisa i to spisak kupaca iz 2021. godine i spisak kupaca na dan 31.12.2025. godine. Privremena stečajna upraviteljica je poređenjem utvrdila svi kupci sa istim iznosima koji su na kartici iz 2025 godine su takođe na kartici iz 2021. godine, nije sigurna iz koje godine ta potraživanja potječu, ali su sva starija od 5 godina, te su ista zastarjela i nenaplativa. Navodi da društvo nema u svom vlasništvu ili posjedu nekretnine. Račun društva je blokiran od 26.10.2021. godine, prema potvrdi Raiffeisen banke koja je dostavljena u spis. Na dan 31.12.2025. godine obaveze stečajnog dužnika iznose ukupno 115.104,56 KM i analitika je prikazana na strani 6 izvještaja. Kako iz svega naprijed navedenog proizilazi da društvo ima neizmirene obaveze od 115.104,56 KM, a nema imovine iz koje bi se mogli namiriti troškovi stečajnog postupka. Privremena stečajna upraviteljica navodi da su ispunjeni uvjeti za otvaranje stečaja nad imovinom stečajnog dužnika, međutim kako društvo nema nikakve imovine koja bi mogla činiti stečajnu masu i imovinu iz koje bi se mogli namiriti troškovi stečajnog postupka, predlaže da sud pozove povjerioce i zainteresirana lica, da predlaže otvaranje stečajnog postupka i uplate predujam za obezbjeđenje stečajnog postupka u iznosu od 3.000,00 KM na depozit suda, te da ukoliko niko u ostavljenom roku ne predujmi određeni iznos, donese rješenje o otvaranju i zaključenju stečajnog postupka nad ovim društvom te po pravomoćnosti rješenja dostavi sudskom registru za brisanje istog iz sudskog i drugih registara po pravomoćnosti istog.

Zastupnik po zakonu predlagatelja izjavljuje da ostaje kod prijedloga za otvaranje stečaja, da nema primjedbi ni pitanja na Izvještaj privremenog stečajnog upravitelja, te da je suglasan sa prijedlogom privremenog stečajnog upravitelja. Navodi da je velika većina 80-90 % dugovanja i potraživanja izmirena na način da je vršena kompenzacija bilo isporukom roba, bilo vršenjem usluga, šivenje izrade tekstilnih proizvoda, budući da je stečajni dužnik i prije 2021. godine imao povremene blokada svog računa zbog kreditnih zaduženja. Isto tako pojašnjavamo i da su pomenuta motorna vozila prodana prije zabiljezbe zabrane i otuđenja od Porezne uprave ali i kupci motornih vozila nisu izvršili prijenos vlasništva na svoje ime u momentu prodaje i neposredno poslije tako da je porezna uprava izvršila zabranu otuđenja poslije ovih transakcija prodaje te se tako objašnjava izvještaj MUP-a ZDK Sektora za administraciju

Rješenjem od 26.05.2026. godine, sud je pozvao povjerioce i zainteresirana lica da u roku od 30 dana od dana objavljivanja poziva predlože otvaranje postupka i uplate predujam za obezbjeđenje troškova stečajnog postupka u iznosu od 3.000,00 KM, na depozitni račun ovoga suda.

Navedeno Rješenje je objavljeno na oglasnoj ploči suda dana 29.05.2026. godine, na web stranici suda i u „Službenim novinama Federacije BiH“ broj: 43/26 od 10.06.2026.godine.

Kako stečajni dužnik ima obaveze, dok nema imovine, pa ni za namirenje troškova stečajnog postupka, a povjerioci i zainteresirana lica u roku ostavljenom u rješenju donesenom od strane ovoga suda nisu predložili otvaranje stečajnog postupka niti predujmili novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečaju, odlučeno kao u izreci ovog rješenja.

Sukladno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje usljed nedostatka mase prestaje postojati, te brisanje ovog pravnog lica iz sudskog registra.

Sutkinja:

POUKA O PRAVNOM LIJEKU

Protiv ovog rješenja može se izjaviti žalba
Kantonalnom sudu u Zenici u roku od 8 dana
od dana prijema, putem ovog suda. Žalba se dostavlja u
dovoljnom broju primjeraka za sud i protivnu stranku.

Marina Šapina, s.r.